



## Das Ludwigslied.

Rithmus teutonicus de pieae memoriae Hluduico rege filio Hluduici aequae regis.

Einan kuning ueeiz ih,      Heizsit her Hluduig,  
Ther gerno gode thionôt:      Ih uueiz her imos lônôt.  
Kind uuarth her faterlôs.      Thes uuarth imo sâr buoz:  
Holôda inan truhtin,      Magaczogo uuarth her sin.  
Gab her imo dugidi,      Frônisc githigini,  
Stuol hier in Vrankôn.      Sô brûche her es lango!  
Thaz gideilder thanne      Sâr mit Karlemanne,  
Bruoder sinemo,      Thia czala uuunniôno.  
Sô thaz uuarth al gendiôt,      Korôn uuolda sin god,  
Ob her arbeidi      Sô iung tholôn mahti.  
Lietz her heidine man      Obar sêo lidan,  
Thiot Vrancôno      Manôn sundiôno.  
Sume sâr verlorane      Uuurdun sum erkorane:  
Haranskara tholôta      Ther êr misselebêta.  
Ther ther thanne thiob uuas,      Ind er thanana ginas,  
Nam sîna vaston:      Sidh uuarth her guot man.  
Sum uuas luginâri,      Sum skâchâri,  
Sum fol lôses,      Ind er gibuoza sih thes.  
Kuning uuas ervirrit,      Thaz richi al girrit,  
Uuas erbolgan Krist:      Leidhôr, thes ingald iz.  
Thoh erbarmêdes got,      Uuisser alla thia nôt:  
Hiez her Hluduigan      Tharôt sâr ritan:  
'Hluduig, kuning min,      Hilph minan liutin!  
Heigun sa Northman      Harto biduungan.'  
Thanne sprah Hluduig:      'Hêrro, sô duon ih,  
Dôt ni rette mir iz,      Al thaz thû gibiudist.'  
Thô nam her godes urlub,      Huob her gundfanon ûf,  
Reit her thara in Vrankôn      Ingagan Northmannon.  
Gode thancôdun      Thê sin beidôdun,